

Tekst preuzet sa web stranice Oslobođenja

<https://www.oslobodjenje.ba/dosjei/intervjui/renaud-van-ruymbeke-tuzioci-ne-smiju-sebi-dozvoliti-da-zavise-od-politicke-moci-497605>

INTERVJUI

ponedjeljak

14. oktobar 2019.

Renaud van Ruymbeke: Tužiocima ne smiju sebi dozvoliti da zavise od političke moći

Nedavno penzionisani francuski istražni sudac za Oslobođenje govori kako uspješno istraživati slučajeve velike korupcije vezane za firme i političare



NEMA SUŠTINSKE RAZLIKE IZMEĐU ISTRAŽNOG SUDIJE I TUŽIOCA / AMER KAJMOVIĆ



PIŠE: ZINAIDA ĐELIĆ_

Bh. tužioci i istražitelji moraju biti nezavisni i slobodni, a moraju voditi i računa na koji način vode istragu kako bi ona bila uspješna

Iskusni istražni sudac Renaud van Ruymbeke, čije ime je tokom godina postalo jedno od najpoznatijih u francuskom pravosudnom sistemu, naglasio je za Oslobođenje da tužioci ne smiju sebi dozvoliti da zavise od političke moći.

Složen proces

- Tužilac koji je specijalizovan za korupciju, isto kao i istražni sudija, u potpunosti mora biti nezavisan. To je prvi uslov njihovog rada, izjavio je ovaj nedavno penzionisani sudac, istovremeno naglasivši da je borba protiv korupcije vrlo složena.

Van Ruymbeke u bogatoj 40-godišnjoj karijeri vodio je više velikih istraga, od kojih su neke bile važne medijski, a druge, pak, zbog iznosa pronevjerenog novca na međunarodnom nivou. U našoj zemlji je boravio protekle sedmice kako bi barem dio svog znanja iz oblasti kompleksnih finansijskih i ekonomskih krivičnih istraga prenio i našim tužiocima. Učestvovao je na okruglom stolu Strategija i ključni istražni alati u oblasti kompleksnih finansijskih i komercijalnih krivičnih istraga, koji je organiziran u okviru projekta EU4Justice - podrška borbi protiv korupcije i organiziranog kriminala, a koji je vrijedan 2,2 miliona eura.

- Ovdje sam u okviru evropskog programa iz oblasti pravosuđa, koji vodi jedna agencija našeg ministarstva pravosuđa, i tu sam da podijelim iskustva sa vašim sudijama i tužiocima. Možda sam imao dobru ili lošu sreću da imam veliko iskustvo u ovoj oblasti i da sam dosta radio sa offshore kompanijama, pokušavajući proći kroz tajnovite sisteme i otkriti šta se iza njih krije. Do prije dva mjeseca još sam vodio slučajeve i sada im pokazujem kako sam to ja radio i kako sam se nosio sa slučajevima offshore kompanija, koliko su to komplikovani slučajevi, gdje se krije novac... Moj cilj je da pokažem, kroz svoju praksu i iskustvo, kako se nositi sa slučajevima velike korupcije i kako istraživati slučajeve velike korupcije koji su vezani za firme, političare, političke stranke..., tvrdi Van Ruymbeke, otkrivajući nam da je iz razgovora sa bh. tužiocima uvidio da su jako uključeni u ono što im priča, te da imaju jako dobru volju za saradnju.



Do prije dva mjeseca sam vodio slučajeve i sada vašim tužiocima pokazujem kako sam se nosio sa slučajevima offshore kompanija, koliko su to komplikovani slučajevi, gdje se krije novac.

RENAUD VAN RUYMBEKE: KROZ SVOJU PRAKSU I ISKUSTVO ĆU POKAZATI KAKO SE NOSITI SA SLUČAJEVIMA VELIKE KORUPCIJE

Dodao je da se radi o složenim stvarima i da je riječ o vrlo komplikovanim slučajevima offshore pranja novca u inostranstvu.

“Vrlo je složeno otkriti te mehanizme, na koji način su te operacije napravljene. Mi imamo prednost što smo radili na složenim predmetima tako da možemo naše znanje prenijeti. Potrebni su instrumenti pomoću kojih se mogu rješavati takvi slučajevi. Ono što treba stalno imati na umu jeste da ta borba nije jednostavna. Borba protiv korupcije je vrlo složena”, kaže Van Ruyambeke.

Ovaj dugogodišnji istražni sudac pojašnjava nam da je informacija ključni element u finansijskoj istrazi. Ona može doći od informanta, ali i od novinara. Na istražitelju, policiji i tužiocima je da sarađuju. Istražitelj prikupi informacije i podastre ih tužiocu, a na tužiocu je da kontroliše te informacije, da odbaci loše i prihvati dobre.

- Predmeti korupcije sve više imaju međunarodnu dimenziju i mi im pokazujemo metode rješavanja takvih slučajeva. Pokazujemo im instrumente rada, uz pomoć kojih će iznijeti slučaj, a ne izgubiti ga. Cilj ove obuke jeste senzibilizacija tužilaca kako bi njihov rad bio koristan i ja se nadam da će ovaj rad i biti koristan, naglašava naš sagovornik.

Francuska je jedna od tri zemlje u Evropi koje još imaju sistem istražnog sudije, što je svojevremeno prije reforme pravosuđa postojalo i u našem pravosudnom sistemu. Renaud van Ruymbeke pojašnjava da nema suštinske razlike između istražnog sudije i tužioca. Nebitno je uopšte ko vodi istragu, da li istražni sudac ili tužilac, bitna je sama tematika i oblast koju radi.

- Ono što je iznimno bitno jeste da tužilac koji je specijalizovan za korupciju, isto kao i istražni sudija, bude u potpunosti nezavisan, napominje ovaj istražni sudac u penziji.

Čestito pravosuđe

To što se trenutno u nekim zemljama odvijaju antikorupcijske istrage ne znači da kod njih ima više korupcije u odnosu na druge zemlje, dodao je Van Ruymbeke, nego to znači da ima tužilaca, odnosno istražnih sudija koji su nezavisni i slobodni u svom djelovanju i koji nemaju veze sa političkim vlastima.

On za brojne afere u bh. pravosuđu nije čuo, istovremeno naglašavajući da je francusko pravosuđe “čestito i pošteno”.

- Kod nas se kritikuje pravosuđe samo zato što se od pravosuđa očekuje da riješi sve, zaključuje na kraju.

TAGOVI

- [RENAUD VAN RUYMBEKE](#)
- [KORUPCIJA](#)
- [TUŽIOCI](#)
- [ISTRAŽNE SUDIJE](#)
- [EU4JUSTICE](#)